

23 APR 2002

Ikim-Mahathir

DR MAHATHIR SUARAKAN MENGENAI ISLAM SEJAK DI AWAL KERJAYANYA LAGI

MELAKA, 23 April (Bernama) -- Datuk Seri Dr Mahathir Mohamad telah sering membicarakan tentang Islam dan umatnya serta segala permasalahan mengenainya sejak di awal kerjaya politiknya lagi dan pandangannya adalah konsisten, kata Pengerusi Jawatankuasa Majlis Fatwa Kebangsaan Datuk Dr Ismail Ibrahim.

Beliau berkata di peringkat nasional dan antarabangsa, Perdana Menteri sering menyatakan kebimbangannya tentang elemen yang membawa kepada perpecahan umat Islam, kemunduran mereka di dalam bidang ilmu pengetahuan, ekonomi, keruntuhan moral dan sebagainya.

Dr Mahathir amat prihatin tentang keadaan negara Islam yang kaya raya dengan hasil minyak dan lain-lain tetapi tidak dapat menggunakan kekayaan itu dengan sebaik-baiknya untuk mempertingkatkan prestasi dan kekuatan umat Islam dalam dunia global, katanya semasa membentangkan kertas kerja "Pemikiran Mengenai Islam" pada Kolokium Pemikiran Dr Mahathir Mohamad di sini hari ini.

Beliau memberi contoh penubuhan Institut Kefahaman Islam Malaysia (Ikim) pada tahun 1991 sebagai antara idea Dr Mahathir yang mahukan penekanan diberi tentang agenda kefahaman Islam yang global dan universal di kalangan orang Islam dan bukan Islam.

Katanya tidak seperti kebanyakan orang Islam melihat dan memahami Islam sebagai satu ritual yang menyentuh sebahagian kecil kehidupan mereka, tetapi Dr Mahathir melihat Islam sebagai satu sistem yang menyeluruh untuk pembangunan umat Islam dalam segala cabang ilmu pengetahuan, sains dan teknologi, ekonomi, politik, sosial dan sebagainya.

Dr Ismail berkata pengiktirafan antarabangsa terhadap pemikiran Dr Mahathir terserlah terutama ketika beliau (Perdana Menteri) menggunakan forum-forum dunia seperti Pertubuhan Bangsa-bangsa Bersatu (PBB), Pertubuhan Persidangan Islam (OIC) dan Kumpulan G-8, untuk menyuarakan secara konsisten pandangannya tentang dunia Islam.

Semasa bercakap kepada pemberita kemudian, Dr Ismail mengingatkan ahli agama yang berpolitik supaya sentiasa berhati-hati mengeluarkan kenyataan mengenai sesuatu perkara untuk mengelak kekeliruan di kalangan orang ramai.

"Kita lihat sekarang sudah ada satu trend dalam masyarakat yang lebih suka belajar ilmu agama daripada ulama politik, implikasinya (maka) orang agama dalam politik perlu amanah dalam menyampaikan ilmu mereka," kata bekas ketua pengarah Ikim itu.

-- BERNAMA

SBS RON